

Couh Yienghneix Menhmenh Majhung



“Seizgan lumj raemxdah lae bae, hwnzngoenz mbouj duenh.” Seizgan menhmenh gvaqbae, dou hix menhmenh majhung. Vunzcaen henho, lauxsae son’ gyauq, bouxdoh daezsingj, ceksaw gangj dauhleix, swnghhoz rumzrumz fwnfwn roxnaeuz caengzging maezvaeg, doeknaiq caeuc roxsingj, gizgiz cungj youq diuzloh seiqvunz dou louz miz gij riz ngauez de, hawj dou moengjmoengj doengjdoengj byaij coh baenzvunz.

Gou “seiznyaeg mbouj rox ronghndwen, heuhguh batnyawhhau”, seizneix, daxmeh couh naihsim lwnh gou nyi, aen neix dwg ronghndwen, lij lwnh gij gojgaeq “Dah Cangzngoz Mbin Ronghndwen” hawj gou nyi, de

unqswnh gangj daengz dah Cangzngoz baenzlawz gwn roengz siendan, mbin coh ronghndwen, gou dingq ndaej yinxsis, lumjbaenz swngeij hix youq ndaw ronghndwen gvaengx mbin. Gou caenh ngaueq daxmeh gangj gojgaeq, yaephe boemz youq gyauejhoq de, yaephe youh saetsaet diuqdiuq heux de baenq. Gojgaeq dingq lai le, gou couh ndaenggon lwnh hawj gyoengq nyezdohi nyi, gyoengqde baiqfug dwk cim gou, gou gig yiengjsouh cungj cingzcek neix.

Yamqdin seizgan mbouj dingz byaij bae, yaepyet gou couh haeuj siujyoz lo. Siujyoz hawj gou hag rox le hauqswnh bohme, hix hag rox le haujlai Sawgun. Moix baez gou fanhai

bonjsaw yawjraen gij cabdoz sengdoengh caeuc gij gojgaeq mizyinx haenx, lwgda hix raen ndaej engq gvangq, mbouj caiq ngaueq daxmeh gangj gojgaeq hawj gou, cix dwg swngeij gag yawj saw caiqlix cingj daxmeh son cih saw gou mbouj rox haenx. Riengz gou rox saw demlai, gij nienzgeij gou hix demlai, gou hainduj hagsib doglaeb swnghhoz, lumjbaenz swngeij daeb denz, dangyienz gijneix noix mbouj ndaej daxmeh bangfwngz. Daengz siujyoz sam nienzgaep, riengz gij hagsib goqmoeg demlai, gij guhcaemz seizgan gou yied daeuj yied noix, nyapnyuk hix daeuj riengz lo. Gou dauqdae mingzbe “lwngyez iqet, mboujmiz nyapnyuk, baez yaepda, nyapnyuk bienq lai lo” gij eiqsei gawq vah neix lo. Gou youq ndaw saw hag rox le haujlai cihsiz, hag rox le Yinghyij, ndaej yungh Yinghyij caeuc vunz doxdongx. Riengzlaeng menhmenh majhung, gou hix rox hozhaenz lo, yawjraen bouxwnq miz doxgaiq guhcaemz moq, miz saejdaeuz gou hix ngaueq daxmeh aeu, hoeng daxmeh mbouj dwg yienghyiengh hawj gou rimhoz, de hawj gou roxnyinh “lajmbwn mboujmiz gij haeuxliengz gwnndwi haenx”. Youq haj nienzgaep baez gaujsi ndeu, gou gauj ndaej gig yaez, youq gwnz roen ma ranz, gou gag sim mbouj onj. Dahraix, gou deng daxmeh ndaq lo, riengzdaeuj swyouz hix mboujmiz lo, seizgan deng daxmeh baijbouh ndaej rimmwdmwd. Doeklaeng, gou hix mbouj hawj caezgya

saetmuengh, hagsib cingzcek youz yaez bienq ndei, daxmeh cij cuengqsoeng guenj gou. Roek nienzgaep dwg siujyoz duenh gatlaeng, youq ndaw bi nyaengqny’ nyi neix, gou hag ndaej haujlai cihsiz mizik caeuc dauhleix guh vunz.

Riengzlaeng seizgan gvaqbae, gou yamq haeuj cunghyoz lo, gyoengq hujgeiq gaxgonq gag boux gag bae gak dieg. Haeuj cunghyoz le, seizgan engq noix lo, hagsib nyaengqny hawj gou noix bae haujlai seizgan guhcaemz, hoeng hix soundaej gij cingzngaih cingqcaen haenx. Hainduj gou mbouj gvenq gij diegdeih hagsib moq, hoeng gou roengzrengz diuzcingj gij simcingz gou, caemhcai miz hujgeiq bangcoh le, swnhleih sug le cunghyoz swnghhoz.

Youq gij ndwenngoenz neix, gou menhmenh majhung, rox daengz bohme mbouj yungzheih caeuc gij dwgrengz baihlaeng de, hix rox ndaej engq lai dauhleix, gou mbouj caiq euqsingq, hix mbouj caiq heuh’ aeu. Gij raemxhanh daxmeh sawj gou engq giengienz, lauxsae son’ gyauq caeuc gij dauhleix ndaw saw sawj gou engq coengmingz, caengzging maezvaeg doeknaiq caeuc roxsingj hix vih gou majhung bu loh. Youq gij saedcej gvaqbae neix, aen simlingz gou majhung lo, aen dungxsaej gou bienq coengmingz lo, couh yienghneix, gou menhmenh majhung lo.

(Loz Swjgiz raiz
Yinj Fuzgen hoiz)

Riunyumj Sawj Saedcej Engq Gyaunde

Saedcej lumj fuk veh gyaunde ndeu, riunyumj cix dwg gij saekcaij ndaw veh ceij lingzdoengh haenx; saedcej lumj souj go ndeidingq ndeu, riunyumj cix dwg gij fouzhauh ceij gamjdoengh vunz ndaw hot fwen; riunyumj, dwg vahgawq ceij gyaunde ndawbiengz, de ndaej cienzoengq raejrub, hawj vunz ligliengh, sawj saedcej bienq ndaej engq gyaunde.

Gou seizi, mbei iq dangqmaz. Miz mbat ndeu, bohme daiq gou bae benz dat. Muengh aen dat sangvidvid haenx, doiq gou daeuj gangj, neix saedcaih beij benz mbwn lij nanz. Hoeng bohme gujli le, gou lijdwg gag cangqdamj, daenj mauhgang naekgywg, cug ndei cag’ ancienz, hainduj benz dat lo.

Gou gannanz dwk benz doxhwnj, moix yamq cungj siujsim riri. Dang gou benz ndaej loq sang seiz, nyaenx mbouj ndaej yawj dauq laj da ndeu, baihlaj lumj aen vaengz laeg fanh ciengh ndeu, ndaw sim fwt dwglau dangqmaz, ga gou hainduj mbouj souh gaemhanh dwk saenzdwdwd, gou dingzyouq mbouj benz doxhwnj. Gou ca gaenj cag’ ancienz, raemxda nyoenz daengz ndaw gvaengzda.

Daxmeh raen gou yienghneix lau, you dangqmaz, de doq sing hung hemq gou haengqrengz benz, doq naj loh riu. Gij riunyumj haenx lumj nditrongh seizdoeng, cig ciuq haeuj ndaw sim gou, gyaepsanq gij dwglau haxbaenh. Gou dauqungz cingzsaenz hwnjdaeuj, vaiqvid gvaq le doenghij gvangaj baihlaeng, dwg gij riunyumj daxmeh hawj rengz hawj gou.

Hoeng, aen gvangaj ceiqlaeng — byaij seigang, youh hawj gou yamq haeuj dieggungz. Dieg sangngaungau neix, cij miz diuz seigang saeqsisi ndeu, gou ndaw sim lau dangqmaz. Gou da yawj coh daxmeh, muengh de gouq gou, daxmeh youh caiq raejrub dwk riunyumj hoizwngq gou. Mbatneix, gij najriu de lumj diuz ndit banhaet ndeu, daiq gij ronghgywg maqmuengh, sawj rumznit gaxgonq bienqbaenz le rumzraeuj. Gou sup gaemz heiq hung ndeu, haengqrengz byaij bae, cimyawj baihnaj, baez yamq baez yamq byaij gvaq le seigang. Byaij sat seizde, gou gikdoengh dwk coemj haeuj ndaw rungj daxmeh bae. Cingqdwg gij riunyumj daxmeh, hawj gou miz damjliengh hoenxhingz gunnanz.

Riunyumj, bingzciengz mbouj



miz vunz dwen de, hoeng de cix miz gij ligliengh mbouj liux mbouj nauq. De ndaej youq raeuz roxnyinh mboujmiz bangcoh seiz nai raeuz, youq raeuz roxnyinh ndaw sim lau seiz daiq daeuj damjliengh, youq mwh raeuz guh saeh mbouj swnh gujli raeuz. Mbat riunyumj genjdanh ndeu, mboujdan ndaej raejrub aensim bouxwnq, hix ndaej hawj bonjfaenh

souhaeuj angqyangz.

Hawj raeuz youq ndaw ndwenngoenz riunyumj lai di ba, yungh riunyumj hoenxhingz moix aen gunnanz, yungh riunyumj cienzndenq moix faenh raejrub. Aenvih, riunyumj ndaej sawj ndwenngoenz bienq ndaej engq gyaunde.

(Cenz Yiz Vwnzungz raiz
Nungz Cinfung hoiz)